

NOTICIA DI
GOBIERNO

ISLA((•))NLINE

20
22

Diahuebs 12 Mei 2022

Email: IslaOnline@gobierno.aw Tel: 528-4952



Gabinete Wever - Croes II

2022

**AÑA DI INVERSION
Y OPORTUNIDAD**



Durante apertura di veld cu yerba artificial na Parke Curason Jaburibari

NOMBER DI E VELD A BIRA CRUYFF COURT DENZEL DUMFRIES



Diaranson Prome Minister Evelyn Wever - Croes tabata presente na Parke Curason Jaburibari pa reapertura di “Johan Cruyff Court”. Na e ocasion a gradici Minister Endy Croes cu e bunita proyecto y e barrio di Jaburibari cu e hoy a veld di yerba artificial. Ademas a cambia e nomber di e veld y a inclui e nomber di un heroe deportista local Denzel Dumfries, cu hopi hoben ta admira. Cruyff Court Denzel Dumfries a keda den miho condicion pa asina nos hobennan por practica nan deporte.

Na e ocasion famianan di Denzel Dumfries a expresa di ta sumamente orguyoso y contento cu a nombra e veld na su honor, cual Gobierno tambe ta sumamente orguyoso cu ne. Prome Minister a gradici Minister di Deporte señor Endy Croes tambe pa su determinacion pa ehecuta e proyecto aki.

“Nos conoce Minister Croes como un Minister hopi determina y un persona cu ora cu e pone su curason y su mente den algo, e ta percura pa logr’e apesar di cualkier contratiempo cu e por topa den su caminda,” Prome Minister a expresa.



Terminando, Prome Minister Wever-Croes a bisa: “A priminti Aruba cu lo crea mas oportunidad pa nos hobennan por haci deporte y Gabinete Wever-Croes ta cumpliendo cu esaki. Pabien Aruba”.

Continuacion **NOMBER DI E VELD A BIRA CRUYFF COURT....**



Prome Minister Evelyn Wever - Croes:

PROME MINISTER TA FELICITA ARA CU 35 AÑA COMO NOS COLEGIO HALTO DI ESTADO

“Bo no por papia di democracia si bo no tin un Controlaria General den bo pais”



Diahuebs mainta, durante Conferencia di Prensa di Gobierno di Aruba, Prome Minister Evelyn Wever-Croes a felicita Controlaria General, Algemene Rekenkamer (ARA), cu ta celebra 35 aña. ARA ta e un pilar fundamental di e democracia di nos pais. Bo no por papia di democracia si bo no tin un Controlaria General den bo pais. Un pilar sumamente importante.

FUNCION DI ARA:

ARA ta nos colegio halto di estado cu ta encarga cu e trabou importante di asisti Parlamento den nan tareanan di controla Gobierno. Den e cuadro aki ta hopi importante pa ARA ta consisti constantemente structuralmente di personanan cualifica, prepara pa por haci investigacionnan necesario sea ora cu e wordo pidi of di propio iniciativa pa asina por duna un opinion riba entre otro e cuentanan anual di Gobierno, proyectonan y otro tipo di desaroyonan.

META DI GABINETE WEVER-CROES:

Un di e metanan di nos Gabinete ta pa fortifica e pilar aki, fortifica e instituto halto di estado aki mas tanto posibel pa asina nos fortifica tambe nos sistema, nos orden democratico cu nos tin den nos pais. Pa esaki nos a institui un comision “Versterking Democratisch Bestel” cu ta yudando Gobierno riba e fortificacion aki riba diferente pilar. Cuminsa riba e Ombudsman, a traha riba Raad van Advies cu pronto lo wordo trata den Parlamento, ta sigui cu Parlamento mes y cu

ARA. E meta ta pa independisa e institutonan aki mas tanto cu ta posibel, fortificando nan pa asina nan por haci e trabou importante di check and balances cu pueblo di Aruba ta conta riba dje.

MIEMBRONAN NOBO DI ARA:

Algemene Rekenkamer ta consisti di miembronan nobo cu apenas a hura un luna pasa. Señora Xiomara Croes tin un estudio den business finance y e tin 30 aña di experiencia riba e tereno financiero tanto den sector publico y sector priva a traves di su compania chikito cu e tawata tin. Recientemente señora Xiomara Croes-Williams a wordo proponi door di Parlamento pa lidera, bira presidente di e colegio aki.

Señor Christopher Lake tin un estudio di Business Economics y ta dirigi un compania grandi na Aruba y hopi di nos conoce tambe como hooffcomissaris di scouting Aruba.

Señor Rick Samuels, un abogado conoci aki na Aruba, ya caba desde 2017 ta miembro di ARA.

“E tres personanan aki ta forma e colegio di ARA cu awor ta completo. Nos tin tambe secretaris di ARA, señora Mary Ann de Jong-Curet cu ta e motor tras di tur loke ARA por logra hunto cu e ekipo di personal hopi dedica y cualifica cu ta traha na ARA. Mi kier yama e miembronan pabien y bon bini. Pabien ARA cu celebracion di 35 aña. Hunto cu e secretaris mi ta sigur cu lo logra tur meta.”, Prome Minister a termina bisando.

Prome Minister Evelyn Wever - Croes: **Durante e di XII Congreso di CAROSAI na Aruba:** **ARA LO ASUMI PRESIDENCIA DI CAROSAI** **PA UN PERIODO DI TRES AÑA**

Durante conferencia di Prensa di Gobierno di Aruba diahuebs mainta, Prome Minister Evelyn Wever-Croes hunto cu miembronan di Controlaria General, Algemene Rekenkamer (ARA), a anuncia cu entre 15 pa 19 di mei 2022, Aruba lo ta anfitrión di e XII Congreso di CAROSAI na unda cu diferente orador internacional lo ta presente pa elabora riba e tema central di e congreso, "Targeting Superior Audit Impact". Prome Minister tambe lo ta un orador invita den e congreso.

Señora Xiomara Croes, presidente di ARA a elabora mas riba e parti di e congreso y riba CAROSAI. Actualmente, Algemene Rekenkamer Aruba tin e posicion di vicepresidente. Entrante otro siman, durante e congreso, Algemene Rekenkamer Aruba lo asumi presidencia CAROSAI pa un periodo di tres aña. CAROSAI, ta e organisacion di Controlaria Generalnan di Caribe y ta cay bou di e organisacion internacional di Supreme Audit Institutions –INTOSAI-. Miembrecia di CAROSAI ta habri pa tur organo halto di control den region Caribe y ta conta cu miembrecia di 23 pais/isla.

"Mi ta contento y orguyoso cu Aruba ta bay haya e presidencia di CAROSAI, cu ta pa Aruba un honor grandi. ARA a logra esaki cu hopi trabou duro, dedicacion y determinacion, pero especialmente e bon nomber cu ARA tin y ta proyecta tambe den exterior. Solamente nos mester percura pa e algemene rekenkamer di Aruba keda funciona manera nos conoce, riba e nivel cu nos conoce, pero tambe aworaki cu e responsabilidadnan internacional di region di Caribe cu ta trece mas trabou", Prome Minister a expresa.

Den nomber di Gobierno di Aruba y pueblo di Aruba en general, Prome Minister ta felicita ARA pa nan 35 aña y pa e funcion di presidencia di CAROSAI.



SPEAKERS



Gabinete Wever - Croes II

Algemene Rekenkamer



TARGETING SUPERIOR AUDIT IMPACT
MAY 15 - 19, 2022

Gabinete Wever - Croes II

Prome Minister Evelyn Wever - Croes:
Den number di Gobierno di Aruba:
PROME MINISTER TA GRADICI TUR
ENFERMERO RIBA DIA DI ENFERMERIA
"Tawata un privilegio pa nos yuda sirbi desayuno na
nos enfermeronan"



Diahuebs mainta, hunto cu Minister di Salubridad, señor Danguí Oduber, Prome Minister Evelyn Wever-Croes a bishita Docter Horacio Oduber Hospital en conexion cu Dia di Enfermeria pa gradici y felicita nos enfermeronan y desea nan animo pa sigui cu e trabou grandi y importante aki. "Mi ta contento di a saluda e enfermeronan y gradici nan pa e trabou grandi cu nan a haci durante e pandemia y e trabou cu nan a sigui haci despues. Tawata un privilegio pa nos yuda sirbi desayuno na nos enfermeronan cu tawata un treat di hospital", Prome Minister a expresa.

Durante su bishita na Hospital, Prome Minister a tuma nota di e expresionnan cu a wordo haci mientras cu el a combersa cu bishitante y pashentnan. Tur ta palabranan di elogio pa cu nos enfermeronan, pa e cuido cu hospital ta duna, pa e edificio renoba di Hospital y e servicio cu Hospital ta brinda.

Dia di Enfermeria ta un dia cu como comunidad, nos ta para keto pa reconoce e trabou grandi cu e enfermeronan ta haci

na Aruba. Nos enfermeronan ta esnan cu ta cuida di esnan cu mester di cuido sea pa salud of sea cu nan mes no por cuida nan mes. Nos enfermeronan ta haci un trabou increibelmente grandi.

"Durante e pandemia mi ta corda cuanto anochi nos tabata sali pafo, nos tabata bati man pa nan constantemente. Mi mes tabata varios di e anochinan aki den hospital y bo por a weita e gratitud di esnan cu ta sali e ora ey pa gradici nos enfermeronan pa nan trabou", Prome Minister a duna di conoce.

Mientras cu awor por bisa cu nos a sali di e pandemia, e retonan pa nos enfermeronan no a bira menos. Nan ta traha cu un cantidad limita di persona. Tin gastonan den cuido cu mester a corta. Y ta den e limitacionnan aki, enfermeronan a sigui duna di nan parti cu alma y cuerpo. Nan ta traha bou di hopi precion. Gobierno di Aruba ta purbando di tur manera pa duna bek pa asina tin mas fondo pa por inverti pa asina por expande e cantidad di personal.

Continuacion PROME MINISTER TA GRADICI TUR ENFERMERO....

“Nos ta enormemente agradecido pa e dedicacion di tur e enfermeronan den e temporada dificil di Covid y despues cu e dificultad no a kita. Manera hopi sector despues di Covid, hopi enfermero tambe e cansancio a domina y pone nan bira malo poniendo asina mas precision riba otronan. Nan ta un grupo di persona asina special, dedica y cu un determinacion asina grandi. Awe nan ta muestra tambe hopi contento y uni. Pabien na tur e enfermeronan y danki di curason pa tur loke boso ta haci. Hopi forsa cu e trabou duro y cu Dios bendiciona cada un di boso”, Prome Minister a expresa.



12 mei 2022

DIA INTERNACIONAL DI

ENFERMERIA

A group of nurses in blue scrubs and masks posing for a photo. Some are standing and holding a large sign that says "I AM TEAM TE HOH!". Others are kneeling in front. One person is holding a sign that says "Nurse Life".


DANKI NA TUR ENFERMERO PA NAN

DEDICACION Y COMPROMISO NA SALUD

DI NOS PUEBLO.

Gabinete Wever-Croes ||

A simple line drawing of a nurse's head and shoulders, wearing a cap and having a stethoscope around their neck.



Minister Maduro ta informa:

NA MOMENTO CU TIN DECISION FINAL TA BAY DUNA INFORMACION DETAYA RIBA REFORMA FISCAL 2023



For di hopi tempo ta conoci cu Aruba mester conoce un Reforma Fiscal pa asina por yega na un sistema di impuesto mas simpel, husto y cu base amplio pa asina segura entrada pa Pais Aruba pa por cubri e servicio y inversion cu Pueblo kier mira na Aruba.

Gobierno ta trahando riba e reforma necesario y ta den e proceso pa ricibi comentario di diferente instancia, entre nan, tin 'stakeholders' manera gremio comercial y instancia internacional manera IMF. E informacion cu ta wordo ricibi ta wordo evalua pa haci cambionan necesario prome cu Consejo di Minister dicidi riba e proposicion final cu lo wordo presenta como Reforma Fiscal 2023 na Parlamento di Aruba pa aprobacion.

Na momento cu tin un decision riba e proposicion pa e Reforma Fiscal 2023, Minister di Finansa lo sali brinda informacion mas detaya.

SINTONISA

CONFERENCIA DI PRENSA DI GOBIERNODI ARUBA

Gabinete Wever-Croes

Tur dialuna y diahuebs | 10:00 am

FUNDACION KAPEL DI BETHANIA A REPARTI E PREMIO NA E GANADORNAN DI E ACTIVIDAD DI DIA DI REY

Fundacion Kapel di Bethania(FKB) hunto cu Museo Arqueologico Naciona Aruba (MANA) y otro instancia y persona manera sr. Glen Lacle di Stichting Vrienden van het Sport Centrum San Nicolas, IBISA, fundacion 1403 y Scout San Dominico a bin ta traha hunto y ofrece un evento asina bunita den e barrio di Noord. Especialmente e muchanan y tambe comunidad di Aruba por a goza di un mainta familiar na “Klooster Imeldahof”.

Mientras e muchanan hunto cu nan mayornan tabata pasa pret hungando diferente weganen tradicional of hisa nan fli, otronan a pasa pa haci e workshopnan cu a ser ofreci pa e artistanan Gloria Feliciano y Erika Moran, cu glas di lama y pintamento. Asina tambe nan tabata cana rond admirando of haciendo e quiz di e exposicion y di e kapel. A pasa na e “photobooth” pa saca potret familiar como un recuerdo di e dia cu e decoracion special haci pa dia di Rey. Por a cana rond pa wak y cumpra na e mini bazaar y sin lubida a disfruta di un sopi y snacks ofreci pa FKB y scout. Tur esakinan hunto a haci un dia cu hopi actividad pa un y tur.

Na final di dia, a termina pa saca premionan di e caarchi di actividad, esaki ta un di e forma cu FKB a hasi pa asina logra haya fondo pa sigui mantene y conserva e kapel, exposicion y edificio. Un danki ta bay na comerciante cu a coopera asina bon cu Fundacion Kapel di Bethania pa por a logra otorga e premionan aki na e participantenan.

Ganador di e ticket di actividad ta, Jencey Peterson cu a gana un ‘weekend stay’ danki na Caribbean Palm Village Aruba, Max Ccent a gana un sunset sail cortesia di Pelican Adventures, Naömar Limonier a gana su lunch na Old Cunucu House Restaurant, Cain Koolman a gana gift certificate di Moomba, JKion Pieter a gana gift certificate di Nikkei, Jacob Croes y Ruben a gana nan gift certificate di Paseo Herencia, Marveline Bokehoudt a gana su gift certificate di GF, Marchel Kelly y Franco Bik a gana nan gift certificate di Blue Sport y Luck Browne a gana un bunita cuadro cortesia di e Artista Erika Moran.



Continuacion FUNDACION KAPEL DI BETHANIA A REPARTI E PREMIO....

Fundacion Kapel di Bethania ta sumanete agradici cu tur e instancianan y comercio cu a hasi na esfuerzo pa comunidad pa especialmente nos muchanan por a pasa un dia asina dushi Celebrando dia di Rey. Ta gradici tur nos comerciantenan cu a coopera cu nos Giselle Department Store, Nikkei Sushi, Old Cunucu House, Blue Sport, Paseo Herencia, Moomba Beach, Pelican Adventures, Carribean Palm Village. Tambe na Gloria Feliciano y Erika Moran.

Un gradicimento special pa Subway pa na generosidad di a regala dos plater pa e muchanan di Kinderhuis Imeldahof por a disfruta como nan participacion na e dia aki.

Ta recorda tur hende cu lo tin gana di pasa bishita Klooster pa e 2 exposicionnan of pa bishita e Kapel, cu lo ta habri, dialuna, diaranson y diahuebs for di 9 am te cu 3 pm.

Si ta desea di hasi un donacion na nos Fundacion Kapel di Bethania, lo ta posibel tambe pa deposita riba nos cuenta di Banco na Aruba Bank number di cuenta : 6021690190. Di antemano ta gradici pa e gesto aki y asina yuda nos pa preserva y cuida e e kapel di Bethania y exposicion di "Historia di Parokia di Noord".



Departamento di Impuesto: "STAKEHOLDER SESSIONS" DI REFORMA FISCAL TA CONTINUA CU PARTICIPACION AMPLIO DI GREMIO Y COMUNIDAD



Despues di evalua e contribucion ricibi durante e prome sesionnan di informacion y participacion cu varios stakeholders, ayera e ekipo di Departamento di Impuesto a tene dos sesion detaya dunando asina oido na e feedback ricibi durante e prome tanda. E ekipo di Departamento di Impuesto lo sigui reuni cu algun gremio y tambe sindicato durante e simannan nos dilanti pa asina por conta cu un participacion amplio durante e trayecto di reforma Fiscal den bienestar general di pais Aruba.

PARTICIPACION AMPLIO

Gremionan di diferente sector a participa na e prome tanda di "Stakeholders' Sessions". Aki a presenta e concepto inicial pa introduccion di BTW y otro compensacion riba tereno di inkomstenbelasting, loonbelasting y reparatietoeslag pa mitiga e impacto riba e poder di compra cu e impuesto nobo aki por trece cu ne. Durante e sesionnan aki gremionan por a comparti nan opinion, idea y preocupacion riba e concepto di Reforma Fiscal 2023. Durante e prome tanda, tambe a brinda e oportunidad na gremio pa sinta cu COHO pa expresa nan idea y preocupacionnan encuanto e reforma. Tur contribucion di e sesionnan aki a wordo considera pa por continua cu e desaroyo di e concepto di reforma pa e segunda tanda.

EVALUACION Y EVOLUCION DI E CONCEPTO DI REFORMA FISCAL

Durante e prome tanda di "Stakeholders' Sessions", a propone un concepto di BTW di dos (2) tarifa cu ta keda den e cuadro di e necesidad presupuestario di pais Aruba. E concepto aki a consisti di un tarifa minimo di 6% pa cuminda y bibida (cu excepcion di bibidanan alcoholico) y un tarifa maximo di 18% pa tur otro producto y/of servicio. Despues di e prome tanda di sesionnan DIMP a analisa e "feedback" ricibi durante reunionnan, como tambe e cartanan ricibi di gremionan cu propuestanan concreto. E contribucion aki a conduci na varios

ehercicio di calculonan cu partners den gobierno di Aruba, COHO y IMF, como tambe expertonan riba tereno fiscal, legal y economico pa asesora e impacto economico y social cu e introduccion di un BTW cu un combinacion di tarifa 6-18% por trece cu ne. Como resultado, a logra evalua e concepto inicial y propone dos otro concepto di BTW cu dos diferente escenario pa loke ta trata e tarifanan.

DESARROYO DI UN CONCEPTO INCLUSIVO Y OBHETIVO

Na e momentonan aki e ley di Reforma Fiscal ta den e fase conceptual y lo wordo finalisa na momento cu un conclusion concreto wordo determina pa Gobierno di Aruba. Durante e di dos tanda di participacion cu gremionan a presenta diferente propuestanan di Reforma Fiscal pa identifica preferencia y opinion. Na su turno lo reuni tambe cu gremionan laboral y social na unda lo ricibi nan contribucion di ideanan y preocupacionnan. Cu participacion di gremionan laboral y social lo continua cu participacion masal di comunidad y evalua e Reforma Fiscal for di e angulo socio-economico, sigurando inclusion y transparencia den tur nivel di nos sociedad.

Departamento di Impuesto ta satisfecho cu e desaroyo inclusivo di e Reforma Fiscal cu ainda ta den su fase conceptual. No obstante e "timeline" ambicioso, e prome tanda di participacion a experencia un retraso minimo di algun siman. E ekipo di Reforma Fiscal kier a gradici tur 141 personanan representando gremio comercial/economico cu a participa den un of mas di e 11 Stakeholders Sessions, como tambe departamentonan di Gobierno, COHO y IMF cu a contribui cu nan experticio durante evaluacion di e prome tanda di reunionnan di participacion. Por conclui cu e Reforma Fiscal ta yegando na e ultimo parti di participacion y inclusion pa asina, cu participacion amplio di gremio y comunidad, por yega na un concepto di Reforma Fiscal den bienestar general di pais Aruba den forma transparente y husto.

2022
AÑA DI INVERSION
Y OPORTUNIDAD

**BRINDANDO E
SIGURIDAD PA
UN MIHO
SOCIEDAD**

MINISTER
Rocco Tjon



A HACI ENTREGA DI HELM NOBO PA E UNIDAD DI MOTOR DI CUERPO POLICIAL DI ARUBA

“Un momento hopi ameno caminda por a combersa cu e Agentenan Policial di e motor unit caminda nan mes a indica otro plannan cu nan tin pa por eherce nan trabou mas miho ainda, y nos ta bay spera e documentonan en cuestion for di nan pa asina por cumpli cu e peticion aki cu nan tin.”

Diaranson merdia, durante un encuentro ameno na Bestuurkantoor, Minister di Husticia y Asuntonan Social Sr. Rocco Tjon, a haci entrega di helm nobo special na e unidad di motor di Cuerpo Policial. E unidad di motor, a indica cu nan tin un necesidad pa helmnan nobo, pa nan propio siguridad, cual ta e motibo tambe cu di parti di Ministerio di Husticia a percura pa presupuesta y realisa e proyecto aki debidamente.

Manera ta conoci, presupuesto 2022 a wordo aproba recientemente, diferente proyectonan relativamente chikito a wordo incorpora den e presupuesto aki, sinembargo nan ta proyectonan sumamente importante pa eleva siguridad di nos agentenan policial. Den cuadro di esaki, a haci entrega di e helmnan nobo cual lo eleva nan propio siguridad ora cu nan ta eherce nan taereanan riba nos careteranan. Ta asina cu e helmnan bieuw no tawata cubri e agente suficientemente, mirando cu e agente ta core mas riesgo di peliger. A base di esaki, a sondea pa diferente tiponan di helm cu ta eleva aun mas e siguridad di e agente, y asina a yega na e helmnan aki. Lokual tambe ta haci e helmnan aki special ta cu e tin protector pa wowo pa anochi y den dia.



Continuacion A HACI ENTREGA DI HELM NOBO PA E UNIDAD DI MOTOR....



Di otro banda e proceso pa adkiri e bulletproof vestnan a wordo finalisa y lo inicia cu e pedido pa cu e bulletproof vestnan pa tur e agentenan policial. Siman pasa a elabora riba e proyecto di ICT caminda ta bay percura cu agentenan policial por haci nan trabou mucho mas miho, e wardanan ta bay wordo ekipa cu camara, y asina tin alrededor di 20 proyecto cu substancialmente lo bay eleva e seguridad y e servicio cu agentenan policial por brinda na nos comunidad. Banda di esaki tin proyectonan mas grandi y infrastructural caminda ta bay muda diferente departamento pa e edificio di ex-Codemsa. Si tur cos ta bon e proyecto di ley aki, lo wordo entrega na parlamento pa por trate, prome cu reces di Parlamento di Aruba na juli.

Por ultimo, e mandatario a accentua e importancia di e parti di “bedrijfsvoering”, mirando cu na final di dia por presupuesta e fondonan, pero e ta necesario tambe pa e fondonan cu ta presupuesta wordo usa pa por ehecuta e tipo di proyectonan aki.





REAPERTURA DI CRUYFF COURT DEDICA NA E GRAN FUTBOLISTA DENZEL DUMFRIES

Diaranson atardi den un ceremonia bunita a tuma luga reapertura di Johan Cruyff Court na Parke Curason situa na Jaburibari. Presente na e ocasion special aki tabata Presidente di Parlamento sr. Edgard Vrolijk, Parlamentarionan di Fraccion di Mep, Minister President sra. Evelyn Wever- Croes y esposo Kenneth Wever, Minister di Husticia y Asuntonan Social sr. Rocco Tjon, famia di Denzel Dumfries, sr. Simon van Rooijen di Cruyff Foundation, ex. Minister di Deporte Sr. Lee, prensa y demas invitado.

E cancha di yerba artificial a keda inaugura na november di 2006 pa Johan Cruyff den feliz memoria y Reina Beatrix. Pa 16 aña largo e cancha a sirbi pa tanto mucha, hoben y adulto por haci uzo di parke pa practica e deporte di futbol.

Minister di Enseñansa y Deporte Endy Croes, den su discurso elocuente a duna un relato breve di e historia di e parke social cual tabata un vision di ex Minister di sr. Ramon Lee. Na unda a elimina e dump cu tabatin na e sitio y Gobierno a construi un parke social, caminda mucha y hobennan por practica deporte. E mandatario a sigui bisa cu e ta yena cu emocion y hopi orguyo cu desde awe e parke lo carga nomber di e deportista local cu ta briyando den futbol internacional Denzel Dumfries. Ex Minister di Deporte sr. Ramon Lee tambe a hiba palabra.

Despues di e video cu e mensahe di motivacion di Denzel Dumfries a devela oficial e cancha Cruyff Court Denzel Dumfries. E acto di develacion a wordo haci pa Minister Endy Croes, sr. Simon van Rooijen, Prome Minister Evelyn Wever – Croes, IBISA y Jonathan Ruiz.

Minister Endy Croes y stakeholders; Simon van Rooijen di Cruyff Foundation, AVB, IBISA, FCCA y FFD a firma di e bala di futbol como un acto simbolico na unda cu ta compromete pa mantene e parke den bon condicion pa e hobennan por practica nan deporte.

Finalmente Jonathan Ruiz e hoben deportista cu na aña 2006 a hiba e bala di futbol, a haci e sake di bala hunto Minister Endy



Croes y sr. Simon van Rooijen a duna reapertura di e veld. Minister Endy Croes kier gradici tur e stakeholders pa haci e proyecto esaki posibel. Masha pabien na e barrio di Jaburibai y pueblo Aruba!

Continuacion REAPERTURA DI CRUYFF COURT DEDICA NA E GRAN FUTBOLISTA....



DESPUES DI TEMPESTAD,
LAMA TA BIRA CALMO ATROBE.
ESAKI TA OPORTUNIDAD PA NABEGA Y RECUPERA.
CU BISTA RIBA E HORIZONTE INSIGUR,
PERO CONSCIENTE CU NOS LO SURPASA ATROBE,
TUR RETO NOS DILANTI COMO UN SOCIEDAD UNI.
MANTENE CALMO Y UZA TUR MAL TEMPO
COMO UN OPORTUNIDAD PA SIÑA Y INNOVA
Y CONBIRTI E CRISIS CU NOS A PASA ADEN,
DEN SPERANSA Y POSIBILIDAD NOBO PA NOS TUR.



Feliz diahuebs!



**20
22** | AÑA DI
INVERSION Y
OPORTUNIDAD